



## ПРЕЗИДЕНТ МӘЖІЛІС ТӨРАҒАСЫН ҚАБЫЛДАДЫ

Президент Қасым-Жомарт Тоқаев Мәжіліс Төрағасы Ерлан Қошановты қабылдады.

Мемлекет басшысына Парламенттің төменгі палатасының VIII шақырылымының I сессиясы аясындағы қызметі туралы мәлімет берілді. Сессия басталғаннан бері мәжілісмендердің қарауында болған 82 заң жобасының 20-на депутаттар бастамашылық жасады. Олардың ішінде Заңсыз иемденілген активтерді қайтару, Онлайн-платформалар және онлайн-жарнама, Семей ядролық қауіпсіздік аймағы, сұйытылған газ айналымы, электрлі самокаттардың қозғалысын реттеу туралы және басқа да заңдар бар.

Мәжіліс спикері конституциялық реформаның қорытындысы бойынша Палатаның жұмыс форматына енгізілген өзгерістер жөнінде айтты. Мәжілістің 6 партиялық фракциядан, сондай-ақ бір мандатты депутаттардан жасақталуы заң шығару жұмысының ашықтығын арттырып, сайлаушылармен кері байланысты күшейтті. Олар Үкімет мүшелеріне жолдаған депутаттық сауалдарында азаматтардың өзекті мәселелерін көбірек көтере бастады.

Өткен сессия барысында алғаш рет жылумен қамтамасыз ету саласындағы басқаруға қатысты Жоғары аудиторлық палатаның есебі тыңдалды және аталған салада кешенді проблемалар бар екені анықталды.

Депутаттар қоғамдағы, соның ішінде өңірлерге жасаған сапарлары кезінде жинақтаған проблемалар бойынша жауапты министрліктер басшылығының алдына бірқатар нақты мәселе қойды. Жылу электр орталықтарын және жылумен қамтамасыз ету желілерін жаңғыртуға ерекше назар аударылды.

Қазіргі таңда мәжілісмендер өңірлерде халықпен кездесулер өткізіп жатыр. Сапар барысында Мәжілістің келесі сессиясында қаралатын Су, Бюджет, Салық және Қала құрылысы кодекстерінің жобалары бойынша талқылаулар ұйымдастырылып, ұсыныстар жинақталады.

Сонымен қатар Ерлан Қошанов парламенттік дипломатия аясында атқарылған жұмыстардың қорытындысы туралы айтты. Сессия басталғаннан бері Әзербайжан, Беларусь, Қырғызстан, Ресей, Түркия, Өзбекстан парламенттерінің басшыларымен және басқа да елдердің заң шығарушы органдарының өкілдерімен кездесулер өткізілген.



### ҚҰТТЫҚТАУ ЖЕДЕЛХАТЫН ЖОЛДАДЫ



Мемлекет басшысы Мысыр Президентіне құттықтау жеделхатын жолдады.

Қасым-Жомарт Тоқаев Әбдел Фаттах Ас-Сисиді және Мысыр Араб Республикасының барша халқын ұлттық мейрамы – Революция күнімен құттықтады. Мемлекет басшысы Қазақстан мен Мысыр арасындағы дәстүрлі достық қатынастар мен берік ынтымақтастық халықтарымыздың игілігі жолында одан әрі нығая беретініне сенім білдірді.



Жұлдыз СҮЛЕЙМЕНОВА,  
Мәжіліс депутаты:

ЖАҢА ЗАҢ ЕҢБЕК  
НАРЫҒЫНДАҒЫ  
БӘСЕКЕНІ  
АРТТЫРАДЫ

Заман талабына сай еңбек нарығы да өзгеріске ұшырап келеді. Қазір білікті маманның көрсеткіші – оның дипломы емес, қарым-қабілеті. Шетелде біліктілікті сертификаттау – бұрыннан бар үрдіс. Жақында Мемлекет басшысы «Кәсіптік біліктілік туралы» Заңға қол қойды.

4»



## АҢЫЗБЕН АСТАСҚАН ЖОЛБАРЫСҚАМАЛ

### ЖУАЛЫ

Қасиетті Әулиеата өңірі – аңыз-әпсаналарға бай мекен. Мұнда есте жоқ ескі заманнан сыр шертетін тарихи орын көп. Міне, сондай аңызбен астасқан аймақтың бірі – Жуалы ауданындағы Жолбарысқамал бекінісі.

16»

## «ҚАРМАҒЫМДЫ ҚАП, БАЛЫҚ...»



11  
БЕТ

## ҚҰМ ҚҰРСАУЫНДАҒЫ АУЫЛДАР



12  
БЕТ

## ЖЕТЕЙІН ДЕСЕМ ЖЕТЕ АЛМАЙ...

Қазақстандықтар үшін жыл он екі ай жолаушылар пойызына билет алу мұң. Халық қасқалдақтың қанындай қат болған билеттерді санаулы уақыт қалғанда жекеменшік кассалардан екі есе бағаға сатып алуға мәжбүр. Жолаушылардан бұрын алыпсатарлар санаулы сағаттың ішінде 45 күн бұрын шығатын билетті де алдын ала үптеп кетеді. Алайда құзыретті мекемелер жолаушылар тасымалындағы жүргенсіздікті жөнге салып, жекеменшік кассалардағы делдалдардың қолындағы билетті бақылауға алуға құзыры жүрмейтіндерін айтады. Себебі қазаншының өз еркі, қайдан құлақ шығарса...

6»



## КВАНТ БАҚЫТТЫҢ КІЛТІ МЕ?

Соңғы уақытта кванттық физика, кванттық байланыс, кванттық секіріс сынды терминдер жиі айтылып келеді. 1922 жылы дат ғалымы физик Нильс Бор атом құрылысының кванттық теориясын жасап, физика саласындағы Нобель сыйлығын алғаннан бастап бұл ұғым сәнге айнала бастады десек те болардай. Квант туралы көптеген ғылыми теория жазылып, неше түрлі әдеби шығармалар туды, жүздеген көркем фильм түсірілді. Әсіресе, Голливуд ұжымы бұл тақырыпты кеңінен қаузап, ғылыми-фантастикалық киноларды жауыннан кейінгі саңырауқұлақша қапттатты. «Матрица», «Интерстеллар», «Джавю», «Люси», «Гаттака» («Планета Ка-Пэкс»), «Куб 2: Гиперкуб», «Бұл атласы», «Мандела эффектісі» секілді фильмдер – осының айғағы. Сонымен, квант дегеніміз не?

10»



## ШАЛА ТУҒАН ШАҚАЛАҚТЫ ҚҰТҚАРДЫ

Алматылық неонатологтар 980 грамм болып туған шақалақтың өмірін аман алып қалды. Нәресте жүктіліктің 29-аптасында дүниеге келген.

Анасына Алматы қаласының №2 қалалық перинаталдық орталығында кесарь тілігі жасалды.

«Бала 23 күн бойы өздігінен дем ала алмады, себебі өкпесі жетілмеген, сонымен қатар оған пневмония, жедел респираторлық дистресс-синдромы, өкпе ателектазы, 2-дәрежелі карынша-ішілік қан кету, некротикалық энтероколит, церебральды депрессия синдромы, қозғалыс белсенділігі, диффузды бұлшықет гипотензиясы, шартсыз рефлексстердің тежелуі, өте қысқа ояну кезеңдері, ми ишемиясы, ДВС-синдромы диагнозы қойылған», — деп хабарлады Алматы қалалық қоғамдық денсаулық сақтау басқармасы.

Бөлім меңгерушісінің міндетін атқарушы Жұлдыз Ахметкалиева жаңа туған нәрестеде тромбоздың бұзылуымен сипатталатын және тромбозбен де, қан кетумен де қатар жүретін күрделі патологиялық процесс болғанын айтты.

«23 күн бойы нәресте механикалық желдетуде жатты. Жағдайды тұрақтандырған соң біз оны аппараттан алып, тағы үш күн жансақтау бөлімінде бақыладық. Содан кейін ол реанимация бөлмесіне ауыстырылды. Онда 7 күн жатып, кейін анасымен бірге болу үшін палатаға ауыстырылды. Қазір баланың салмағы 2300 грамм», — деді Жұлдыз Ахметкалиева.

Сондай-ақ реанимацияда дәрігерлер сәбидің көру, есту қабілетін сақтау үшін күресіп, біртіндеп өздігімен тамақтануға және асқазан-ішек жолдарының қалыпты жұмысына көшірген.



## ЖАЛҒАН АНЫҚТАМАМЕН ЖАРҒА ЖЫҚТЫ



Астанада стоматолог-дәрігер, медицина ғылымдарының кандидаты Жеміс Айдарбекова өз басынан өтіп жатқан жағдайға байланысты Мемлекет басшысынан араша сұрады.

Оның айтуынша, бұрынғы күйеуі Мәскеу қаласындағы №4 П.Б.Ганнушкин атындағы психиатриялық емханаға зорлықпен жатқызып, «есі дұрыс емес» деген жалған анықтама жасатқан. Мұны қасақана түрде жеке кәсі-

бін тартып алу мақсатында ұйымдастырған. Бүгінгі таңда осы емханада адамды зорлықпен жатқызу үшін 40 мың рубль жеткілікті екені анықталған. Осы емханадан алынған анықтама Ж. Айдарбекованың Алматы қаласындағы тіс емханасын тартып алып, үш баласын көруге құқығы шектелуіне негіз болған екен. Бұл мәселе бойынша бірнеше мәрте қылмыстық іс қозғалғанмен, бұрынғы күйеуі Р.Гаджиевке заң шеңберінде еш шара қолданылмаған.

Бүгінгі таңда өз еңбегімен құрған кәсібін де, үш баласынан айырылған ана көптеген заң бұзушылық болып жатқанын күйіне жеткізді.

— Мен Руслан Гаджиев есімді Қазақстан азаматына тұрмысқа шықтым. Біздің үш баламыз бар. Өзімнің жеке тіс емханамды 2007 жылы ашқан болатынмын. Ал күйеуім онда қарапайым тіс дәрігері болатын. Бүгінгі таңда бұрынғы күйеуім жалған анықтама арқылы жеке кәсібім мен балаларымды тартып алды, — дейді ол.

Түрлі жағдайлармен қоса, қорқытқан күйеуі оған айтқан талаптарына келіспесе жағдайы бұдан да қиын болатынын айтып қорқытқан. «Маған кәсібімнің 100 пайызын бересің, ессіне саған үй қалады» деп уәде берген күйеуінің сөзіне сенген ол ақырында барлығын тартып алмақ болғанын айтады.

Ж.Айдарбекова қаншама дәлел-дәйектері бола тұра, құзырлы мекемелердің ешқандай әрекетсіз отырғанына қынжылады.

Наурызбек САРША

## РЕКОРДТЫҚ СОМАДА НЕСИЕ АЛДЫ




Елімізде маусым айында жеке тұлғаларға берілген несиенің жалпы көлемі 1,2 триллион теңгеден асты. Бірінші кредиттік бюронның ақпаратынша, оның ішінде кепілсіз тұтынушылық несиенің көлемі 800 миллиард теңгеден аса сома құрайды. Бұл — рекордтық көрсеткіш.

Бұдан басқа қазақстандықтарға 130 миллиард теңгеден астам сомаға автонесие берілді. Мұндай көрсеткіш те бұрын-сонды болмаған.

«Бір ай ішінде 2,5 миллионға жуық адам жаңа несиені алған. Одан бірнеше мыңға көбірек көрсеткіш 2022 жылдың қарашасында ғана байқалған еді. Жағымды жаңалықтың бірі — ипотекалық қарыз берудің орташа мөлшері азайған. Маусым айында ол 15,4 млн теңгеге тең болды», — делінген хабарламада.

Еске сала кетсек, қаржы нарығын реттеу және дамыту агенттігі әзірлеген құжатқа сөйкес, алдағы уақытта банктер мен микроқаржы ұйымдарына төлемін 90 күнге кешіктірген тұрғындарға кредит беруге тыйым салынбақ. Демек, мерзімі өткен борышын өтеу үшін азаматтар қайта қарыз ала алмайды.



## 33 МЫҢ СТУДЕНТ ЖАТАҚХАНАҒА МҰҚТАЖ

Алматыда студенттер жатақханасына деген қажеттілік 33 мың орыннан асады. Бұл туралы Ғылым және жоғары білім министрі Саясат Нұрбектің ректорлармен және инвесторлармен кездесуінде айтылды.

Кездесуде жоғары оқу орындарының жаңа оқу жылына дайындығы және студенттерді баспанамен қамтамасыз етуге байланысты мәселелері талқыланды. Студенттік жатақханаларда орын тапшылығы мәселесін шешуге, қолданыстағы жатақханаларды жаңғыртуға және студенттердің жайлылығын арттыру үшін жаңа технологияларды енгізуге ерекше назар аударылды. Сондай-ақ жаңа студенттік жатақханалардың құрылысындағы ілгерілеушілік қарастырылып, Алматыда студенттік жатақханалардың құрылысы бойынша жобаларды

іске асырумен айналысатын жобалық кеңсенің жұмысы туралы ақпарат ұсынылды.

«Көріп отырғанымыздай, бүгінгі таңда Алматы ЖОО-ларында оқуға ниет білдірушілер көбейіп келеді. Алматы қаласындағы жоғары оқу орындарының деректері бойынша жатақханаға қажеттілік 32 718 төсек-орынды құрап отыр. Бұл — жаңа қабылдауды есепке алмағандағы болжам. Осыған байланысты былтырғы тәжірибені және осы мәселе бойынша тәуекелдерді ескере отырып, жан-жақты шаралар қабылдау қажет. Жоғары оқу орындарының басшыларына 15 тамызға дейін барлық жоспарланған және жұмыстарын аяқтауды, сондай-ақ корпустарда, жатақханаларда, асханаларда және санитариялық тораптарда толық дезинфекциялау жұмыстарын жүргізуді тапсырамын», — деді министр.

## МЕКТЕП АУЛАСЫНДА СУИЦИД ЖАСАДЫ

Көкшетауда мектеп ауласында асылып қалған бойжеткеннің денесі табылды. Бұл туралы Ақмола облыстық полиция департаментінің баспасөз қызметі мәлімдеді.

Ведомствоның мәліметінше, 20 шілдеде Әуелбеков көшесі, 177-үй мекенжайы бойынша орналасқан №16 орта мектеп аумағында асылып тұрған қыздың денесі табылғандығы туралы 102 желісіне телефон арқылы хабарланған.

«Шақыру орнына Көкшетау қалалық ПБ жедел-тергеу тобы бағытталды. Асылып қалған бойжеткеннің Көкшетау қаласының 18 жастағы тұрғыны екені анықталды. Осы дерекке байланысты Қылмыстық кодекстің 105-бабы 1-бөлігі «өзін өзі өлтіруге жеткізу» бойынша сотқа дейінгі іс қолға алынып, сараптама тағайындалды. Оқиғаның себептері мен мән-жайлары анықталу үстінде», — дейді ПД баспасөз қызметінің жетекшісі Гүлнар Пинчук.



## АТАСЫН АЛДАҒАН АЙЛАКЕР КЕЛІН

Шымкентте келін қайын атасының атына екі рет несие рәсімдеп, ақшаны өзі иемденіп алған.

Абай ауданының тұрғыны полицияға өзінің атына заңсыз несие рәсімделгені туралы арызбен жүгінді. Ер адамның айтуынша, ол кезекті төлем туралы хабарлама келген кезде несие туралы кездейсоқ білген. Полицейлер бұл жайтты ҚР ҚК-нің 190-бабы (Алаяқтық) бойынша тіркелді.

Тәртіп сақшылары күдіктінің жеке басын анықтау үшін бірқатар жедел іс-шара жүргізді. Жәбірленушіден, оның отбасы мүшелерінен және әріптестерінен сұрақ-жауап алынды. Смартфонның көбіне қайда және қашан қалдырғаны, жеке деректерін кімге жария еткені, сондай-ақ ақша аударымдары тексерілді. Нәтижесінде, күдікті

анықталды. Ол шағымданушының келіні болып шықты. Өзінің қолығы туралы қайын атасының біліп қойғанын байқап, Түркістан облысындағы туыстарына қашып кеткен. Айлакер келін атасының телефоны арқылы интернет-банкінгі жасырын пайдаланғаны белгілі болды.

— Бірнеше айдың ішінде әйел туысының атына жалпы сомасы 750 мың теңгеге тауар алу үшін 2 несие рәсімдеген. Оларды қолма-қол ақшаға айналдырып, қаражатты өз шотына аударып алған. Күдіктіге қатысты ешқандай кетпеу туралы қолхат түріндегі бұлтартпау шарасы қолданылды. Қазіргі таңда сотқа дейінгі тергеу амалдары жүргізілуде, қорытындысы бойынша процессуалдық шешім қабылданатын болады, — деді Абай аудандық полиция басқармасының анықтаушысы Серік Жантаев.























## «ҚАРМАҒЫМДЫ ҚАТІ, БАЛЫҚ...»

**«Алабұға, ақ балық, қармағымды қап, балық» деп, қолдағы қармақты құлаштап кеп суға лақтыратын едік бала күнімізде. Қазір балықшы көбейді, балық аулауға қызығатындар саны артты. Өйткені демалысын табиғат ортасында өткізгісі келетіндер қатары аз емес. Серуенді өзен-көл жағасында ұйымдастыратындықтан, балық аулауды таза ауаға шығудың бір бөлігі ретінде жоспарлайды. Әрі демалыс қайтады, әрі балық ұстаса, олжасын қазанға салады. Осы орайда әуесқой балықшылық кәсіп пе, әлде бос уақытты қызықты өткізу ме, оның жабдығын қалай сайлау керек, ол нені білуі қажет деген сұрақ туындайды.**

Жәнібек АМАҢГЕЛДІ

### БАЛЫҚ АУЛАУ БЕЛСЕНДІ ДЕМАЛЫС ТҮРІ ЕМЕС

Көнігі балықшылар балық аулауға аттанатын сапарын белсенді демалыспен шатастырмауды сұрайды. Қазір әлеуметтік желі балық аулауды жеңіл кәсіп ретінде насихаттайды. Үлкен балық ұстап алғандарды көрген жан сол жетістікті қайталағысы келеді. Сонымен қатар балық аулаудың қыр-сыры туралы интернеттен егжей-тегжейлі ақпаратқа көп қанығуға болады. Ниеттеніп, бірқатар балық аулауға қатысты әдебиет пен еңбекті оқу арқылы төмен деңгейде болсын қажетті мағлұматқа қанығуға болады. Қазір нарық балықшы++++ керек-жарағының барлық түрін бірнеше баға сегментінде ұсынады. Базарда немесе арнайы аншы немесе балықшыға арналған дүкендерде сатушы немесе кеңесші қармақтың түр-түрін сіздің сұранысыңызға орай жарақтап береді, өз жанынан азды-көпті кеңес немесе тәжірибесімен бөліседі. Бұл саят түрінің аншылыққа қарағанда құрал-сайманы арзан әрі бірнеше мемлекеттік органнан арнайы рұқсат құжатын талап қажет етпейді. Арзан бағада қармақ алып, балықтың қызығына бел шеше кірісіп кетсеңіз, келергі жок. Әуесқой балықшыға резервтегі су қоймасынан бір жолы бес келіден аспайтын балық аулауына рұқсат етілген. Алайда көктемгі уылдырық шашу кезінде балық аулауға тыйым салынған. Шортан, ақмарқа, алабұға, көксерке, торта, аққайран балықтарын 20 сәуірден 20 мамырға дейін аулауға тыйым салынса, сазан, мөңке, жайын, қаракөз, оңғақ, теңге, табан балықтарын 20 мамырдан 30 маусымға дейін аулауға болмайды.

«Балықшы балықшыны алыстан таниды» демекші, осы кәсіпке ден қойсаңыз, табиғат туралы, су тіршілік иелерінің ерекшелігі туралы ақпаратқа қанығып, кәсіби хоббидің ортасына тап боласыз әрі ниеттес жана достар табасыз.

Тек соңғы жылдары балықшы қауымы елдегі су қоймаларында балық қорының азайып кетіп, бес жыл бұрынғы ұстайтын балық санына жете алмайтынын айтып қынжылады. Яғни, кез келген суға қармақ лақтырып балық ала беретін жеңіл дәурен өтіп кеткен. Балықтың азайып кетуін сарапшылар бірнеше себеппен байланыстырады. Біріншісі – жалаңдық жылыну салдары, яғни елдегі өзен-көлдерде су деңгейі азайып, оларға келетін көктемгі су

қарқыны бәсеңдеген. Салдарынан су қоймаларының тереңдігі төмендеп, ірі балықтың тіршілік етуі қиындай түскен. Балдыр түрлерінің және суасты өсімдігінің ыстықта қаулап өсуі оттегі жетіспеушілігіне әкелді. Екінші себеп – судың түрлі зиянды нәрселермен ластануы. Мамандар гидрологиялық ластануды кен өңдеу және ірі өндіріс кешендерінің пайдаланған суын жеткілікті тазартпастан су қоймаларына жіберуі, қала және қала агломерациясының суды шектен тыс пайдалануы кезінде жауапсыз кәсіпорындардың ластанған суды ағызуынан көреді. Бұл да ихтиофаунаның күрт азаюына әкелді. Әуесқой балық аулауға рұқсат етілген су қоймаларының дені ірі елді мекен маңында орналасатыны белгілі. Ал суы біршама таза су қоймаларының көбі қорық, табиғи парк аумағында әрі онда балық аулауға тыйым салынған.

### БАЛЫҚШЫНЫҢ ЖАБДЫҒЫ АРЗАН ТҮРМАЙДЫ

Балықшы Еркеғали Бейсеновтің айтуынша, балық аулаудан тәжірибесі мол адам сирек. Балықтың қай түріне қандай қармақ сайлап, қайсы жем

таңдауыңыз қажет. Баса ескеруге тиісті бір жайт, егер балық аулауға жиі шығуды мақсат тұтсаңыз, онда сападан ақша аямауыңыз керек. Әлгідей бірін-бірі толықтырып тұратын дүниелер қалтаға әжептәуір салмақ салады. Шамамен, қолыңыздағы бір қармақтың толыққанды құны кемінде 150-200 мың теңге болады десек, онда сіз – тәжірибелі балықшысыз. Қай балықты қандай қармақпен қалай аулау керектігін білесіз», – дейді Еркеғали Бейсенов.

Ол аушылықтың егжей-тегжейін білмейтін жаңа базардан қытайлық арзан, дайын қармақтың кез келгенін сатып алып, тәжірибелі балықшыларға еріп көруді ұсынады.

«Сонда қармақ құрылғыларын таңдау, монтаждау, ұстау, лақтыру, жағаға балықты шығару әдіс-тәсілдерінің бәрін меңгересіз. Бұл – өзен-көлдерді жағалау жағынан 30 жыл тәжірибесі бар балықшының кеңесі», – дейді ол.

### БАЛЫҚ ТҮРІ МЕН ҚОРЫ ӨЗЕН-КӨЛДЕ ӘРТҮРЛІ

Балық аулағанда басты назарда ұстайтын жайт – баратын су



қоймаларында аулауға рұқсат бар-жоғын білу. Елімізде өзен-көлдер су бассейндеріне бөлінеді. Ал әр су бассейніне байланысты инспекциялар бар. Сол аумақтық инспекциялардың жергілікті өзен-көлдің мәртебесіне

қолдану керек екенін екінің бірі біле бермейді. Оның пікірінше, балықшы қазіргі заманауи күрделі қармақты пайдалану мен жарақтаудың қарапайым ережесін ескеруі керек. «Бұл ретте қармақтың құрығы, бауы, шарғысы (катушка) бірін-бірі толықтырып тұруы шарт. Ол үшін құрығында көрсетілген тегіне орай, мысалы, 100 грамға дейінгі ауыртылғанды көтеретін фидерге 0,28 мм-ге дейінгі қармақбау мен оның 150 метрін орайтын орауышы бар шарғы таққан дұрыс. Ал жемсауыт салмағының 60 грамнан аспағаны маңызды. Өйткені қалған 20-30 грамм салмақты оның ішіндегі арнайы жемтік толықтырады. Егер жемсауыт пен жемтіктің қосылған салмағы қармақ тегінде көрсетілген 100 грамнан асып кетсе, оны құлаштап суға лақтырарда фидерді сындырып тындым дей беріңіз», – дейді Еркеғали Бейсенов.

Оның айтуынша, шортан, көксерке, алабұға, жыланбас, жайын сынды жыртқыш балықтарды аулайтын спиннингтің де түр-түрі бар. Оның құрығындағы тегі 0,5-1 грамнан 150-200 грамға дейінгі әртүрлі көрсеткіштерді қамтиды. Балықшының пайымдауынша, балықшының тәжірибесі молыққан сайын оның жабдығы кәсіби санатқа өтіп, құнды әрі сапалы түрін таңдауға өтуі тиіс.

«Шарғы, қармақбау және жалтырауық түрлерін де сол көрсеткіштерге байланысты

“

*Әуесқой балықшыға резервтегі су қоймасынан бір жолы бес келіден аспайтын балық аулауына рұқсат етілген. Алайда көктемгі уылдырық шашу кезінде балық аулауға тыйым салынған. Шортан, ақмарқа, алабұға, көксерке, торта, аққайран балықтарын 20 сәуірден 20 мамырға дейін аулауға тыйым салынса, сазан, мөңке, жайын, қаракөз, оңғақ, теңге, табан балықтарын 20 мамырдан 30 маусымға дейін аулауға болмайды.*

қатысты деректері сайтында немесе әлеуметтік желідегі парақшасында жарияланады. Осы тізімге қарап қай көлде балық аулауға рұқсат берілген резервтегі су қоймасы екенін анықтаймыз. Ал кейбір көлдер заңды тұлғаларға жалға берілген. Онда меншіктеуші балық аулауға адам басына немесе көлікке ақы алып көл аумағында балық аулауға рұқсат береді. Бір жақсысы, мұндай көлде балық түрі мен қоры көбірек болуы мүмкін. Өйткені жалға алушы су қоймасын балықтандыруды жүргізеді. Ал оған балықшы қауымының қызығушылығы ескеріледі. Яғни, бұрын бұл көлде кездеспейтін шортан, жайын, аксерке, ақмарқа, дөңмандай аулауға мүмкіндік туады.

Жекелеген су бассейндеріне келсек, балық қоры мол, бұл – Балқаш-Алакөл бассейні. Онда Балқаш көлі, Қаратал, Ақсу, Іле, Лепсі, Аягөз өзендері, Қашшағай су қоймасы, Сасықкөл, Қашқаркөл орналасқан. Одан кейін балықшы қызығушылығы жоғары Ертіс бассейні тұр. Онда Ертіс өзені, Зайсан көлі, Шүлбі су қоймасы, Павлодар облысы аумағындағы көлдер жатады.

Арал-Сырдария бассейні – Сырдария, Шардара су қоймасы, Кіші Аралға құяр саға – Сарышығанақ пен Бутақова бұғаздары, Арыс пен Келес өзендері.

Есіл бассейнінде: Есіл, Нұра, Сілеті өзендері. Нұра-Сарысу бассейні: Шалқар және Шалқаркөл. Тобыл-Торғай бассейні. Жайық-Каспий бассейнінде: Каспий теңізінің солтүстік бөлігі, Жайық, Қиғаш өзендері. Шу-Талас бассейнінде: Асы мен Шу, Талас өзендері жатады.

Елімізде жергілікті эндемик балықтармен қатар, жерсіндірілген кәсіптік балық саны көп. Биология ғылымдарының кандидаты Гүлназ Баринованың айтуынша, Қазақстандағы 156 балық түрінің біразы жерсіндірілген, бірқатары инвазиялық жолмен таралған. Оның қатарында кәсіптік маңызы бар көксерке, жайын, бекіре, солтүстік өңірлерге жіберілген ақсақа, еуропалық көкшұбар, пелядь балықтары бар. Аралға Балтық майшабағы, Сырдария мен Балқаш бассейндеріне – ақмарқа (амур), ақ дөңмандай, амур бұзаубасы жіберілген. Солармен бірге Амур жалған теңге балығы, атерина, көпқабыршақты анабарилиус, үш ерінді балық та араласып келген. Жыланбас, қырлықұрсақ балық, теңбілеккіре, Амур шабағы, қытай элеотрисі Өзбекстаннан Сырдария арқылы бізге келіп жетті. Шығыс Қазақстан су қоймаларына кәсіптік ихтиофаунаны мақсатты түрде қалыптастыру үшін сазан, тыран, көксерке және рипус, байкал омулы, пелядь, чир, муксун, тұқы, ханбалық, ақ амур, дөңмандайлар жерсіндірілген.

Трофей деп аталатын ірі балық аулауға Іле мен Балқаштың оңтүстік атырауы өте қолайлы. Қазақстанда ауланатын балықтың 25 пайызы Іле-Балқаш су алабынан алынады. Қапшағай, Іле, Балқаштан сазан, ақмарқа, жайын, көксерке, алабұға, мөңке, табан, тыран кәсіптік балықтар ауланады.

Шығыс Қазақстан облысындағы Зайсан көліне құятын Қара Ертістің алып шортандары аңызға айналған.

Каспий теңізі немесе оған құятын Жайық өзені бойында да көксерке, сазан, қарағөз, табан, жайын, батпакай (кефаль), ақсыла (жерех) бар. Бекіре балықтарын аулауға тыйым салынған. Тек құтімге (кейде құтыбалық) қатысты шектеу алынған. Жоңғар Алатауындағы өзендерден көкбас (осман), ханбалық аулауға болады.

Батыс Алтайда Қара және Ақ Үбі өзенінде қара балық (хариус) кездеседі, сирек жағдайда қармаққа күмжі (таймень) түсіп қалуы мүмкін. Оны босатуға тура келеді. Өйткені осынау патша балық – Қызыл кітапқа енген, жойылып бара жатқан түр.

Елорда балықшылары қала маңындағы Есіл және Нұра өзені бойынан балық аулайды. Кейде Қорғалжын ауданына аттанады. Өйткені аудан аумағында 100-ден астам көл бар. Алайда көп су қоймасы қорық аумағына енетіндіктен қорғалады. Онда қысқы маусымда ғана балық аулауға рұқсат етіледі. Өйткені ондағы балыққа оттегі жетіспейтіндіктен, балықшылар көлдің әрі тұсынан үкі ойып, су асты жәндіктерінің оттегі тапшылығынан құтқарады.

Қысқасы, еліміздің өзен-көлдерінде өзі көбейіп жататын балық ресурсы – таусылмайтын байлығымыз. Алайда оның өсіп-өнуіне жағдай жасап, санының азайып кетуіне жол бермей, қамқор болуымыз керек.





Елдар ҚАБА (қолжазба)

## БЕРЕКЕСІ КЕТКЕН БИДАЙ ЖЫРҒЫ

**Нәсібін жерден тапқан диқан қауымы мен ұн өндіруші диірменшілердің қазіргі жағдайы мез емес. Нарықта бидай бағасы тым төмендеп кеткені шаруалардың шымбайына батып тұр. Алайда қысы-жазы дамыл таппай еткен еңбегі құр босқа кетіп, көк тиын құны қалмаған шаруалар шарасы қалып, банкротқа ұшырауы мүмкін екенін айтып дабыл қағып отыр...**

Түйінді мәселе осыған дейін Парламент пен Үкіметте де талай көтерілген. Нан бағасы шарықтап, әр өңірде 150, кей аймақта 180-200 теңгеден саудаланып жатыр. Бірақ мемлекеттік органдардың тарапынан жүргенсіз кеткен бағаны бақылауға алып, тосқауыл қойғаны байқалмайды. Ұнның құны да қарапайым тұтынушының қалтасын қағып тұр. Бірақ астықты аймақтарда бидай бағасы тым төмен бағалануда. Бұл орайда Ресейден келетін контрабандалық астықтың елімізге өтуіне қатаң тыйым салынғаны да есте. Бірақ аймақтағы шаруалар іс жүзінде бәрі де керісінше болып жатқанына қапала.

Сарапшылардың деректеріне сенсек, күн сайын Ресейден мыңдаған автокөлікпен ағыла жеткізіліп жатқан арзан бидайдың сапасы казак бидайына қа-

мүлде тақырға отырғызады. Өйткені жанармай, қосалқы бөлшектер, тұқым басқа да қажеттіліктердің бағасы шарықтап кеткен. Өз басым дәл қазір 8 вагон ұнымды өткізе алмай отырмын. Қазір алып кетсе, 8 мың теңгеден болса да сатуға әзірмін. Өзбекстан, Тәжікстан, Ауғанстан сияқты елдің бәріне де елімізден бидай мен ұн сату тиімсіз болып қалды. Бір жағынан, жергілікті вагондарды қымбатқа қойып, шаруалар мыңдаған доллар зиян шексе, екіншіден, шекара арқылы келеннен өткізген кезде тағы сорлайды. Салдарынан, барлық астық өндірісі туралап қалды. Тым құрығанда, шығындарын жабуы үшін бидай 132 мың теңгеден сатылуы керек. Ал мұндай бағаны шаммен іздесе де таппайсың. Бірнеше ай бойы өз диірменімді тоқтатып қоюға мәжбүр



рағанда әлдеқайда төмен болғанымен, жергілікті шаруаларды шаш-етектен шығынға батырған. Қазіргі бағасы шамамен 60-65 мың теңге сомасында ғана саудаланып жатқан ресейлік бидай елдегі ұн өндірушілердің де жағдайын ушықтыра түскен. Ақмола облысы Атбасар ауданында ондаған жылдан бері ұн өндірумен айналысатын Динмагомед Асаев та бидай бағасының шектен тыс құлауының салдарынан ұн өндірісі мүлде тоқтап қалғанын ашына жеткізді. Оның айтуынша, бағаның төмендігінің салдарынан мыңдаған тонна астық өнімдері құр босқа жатып, сапасын жоғалтуда.

— Үкімет тыйым салғанымен, Ресейден Қазақстанға автокөлікпен бидай ағылып жатыр. Өйткені Ресейдегі бидай бағасы бізден де төмен. Оны өткен айда Ресейге шыққанда өз көзімнен анық көрдім. Ресейден келіп жатқан бидай мен ұн біздегі қарағанда әлдеқайда арзан. Яғни, 60-65 мың теңгеден ғана сатылып жатыр. Баға төмен болғандықтан шаруалар минусқа кетіп, шығындарын жаппаса да бидайын осы 70 мыңның айналасында ғана сатуға мәжбүр. Бұл оны

болып отырмын, — дейді Динмагомед Асаев.

Д.Асаев бірнеше жыл ішінде ғана ұн өндіруші диірмендердің тұралап, тіпті мүлде жабылып қалғанын да жеткізді. Оның айтуынша, осыдан бірнеше жыл бұрын елде 128 диірмен болса, қазіргі күні 80-ге жуық қана диірмен жұмыс істеп тұр. Олардың өзі де бидай мен ұн бағасының арзан болуы салдарынан зиян шегіп отыр.

Астық өндіруші компаниялар да астықтың арзандалуы салдарынан бидайын өткізу қиынға соғып жатқанын жасырмады. Бұл орайда ресейлік бидай құнының төмен болуы мәселенің басты себебі екенін аграрлық шаруашылық серіктестіктері ашына айтады.

Астрахан ауданында 11 мың гектардан астам егістік алқабына егін салатын Руслан Экажев те бағаның төмендігінен былтырдан бері бидайын өткізе алмай отырғанын алға тартты.

— Расында да, бидайдың бағасы құлдырап кетті. Ресейден жеткізілетін контрабандалық бидай еліміздегі астық өндірісін тұралапты барады. Былтырдан

бері бір тонна бидайды да өткізе алар емеспін. Қымбатшылық қос өкпеден қысып тұрған қазіргі күнде диқан қауымы әбден қиналып тұр, — дейді Руслан Экажев.

Өңірдің шаруа қожалықтары өнімдері бидай мен ұн, одан нан бағасының төмендеуіне ресейлік бидайдың ағылуымен қоса, басқа да факторлар әсер еткенін жеткізді. Мәселен, Қорғалжын ауданында егін егетін Бауыржан Әбілов шаруалар күні-түні киік күзетсе де, шығынға батып бара жатқанын жеткізді.

— Ресейден бидайдың толассыз ағылуы елдегі тауар бағасын шектен тыс түсіріп жіберді. Қазір әрі кетсе 70-75 мың теңгеден бағаланып жатқанын естідім. Қазір сата қоятын бидайым да жоқ. Оның үстіне, биыл көктен иімей жаңбыр да жаумай кетті. 18 мамырдан бері жаңбыр болмады. Қатты ыстықтың салдарынан көп егін күйіп кетті. Өз басым 600 гектар егін ексем, соның тең жартысы күйіп кетті. Өнім биыл аз болатын түрі бар. Бір жағынан, киіктерден жапа шегіп отырмыз.

Күні-түні киіктерді қуып егімізді таптатпаудың амалын жасаймыз. Бірақ көп шаруашылықтың егінін таптап кеткені рас, — дейді Бауыржан Әбілов.

Түйінді мәселені «Атамекен» кәсіпкерлер палатасы былтырдан бері бірнеше мәрте көтеріп келе жатқанын, бірақ Ауыл шаруашылығы министрлігінен мәселеге қатысты нақты әрекет болмағанын айтады.

— Ресейден келіп жатқан контрабандалық бидайдың бағаны түсіргенін былтырдан бері көтергенбіз. Мәселе хат түрінде Ауыл шаруашылығы министрлігіне де жолданды. Бірақ министрліктегілер бұл тек шаруалардың айтуынан іс жүзінде контрабандалық бидай жөнінде еш әрекет істей алмайтынын жеткізген. Өткен қыстығын бидайын өткізе алмай жатқан шаруалар болғанымен, қазіргі күнге палатаға ешқандай арыз-шағым түскен жоқ. Әр ай сайын комитетте жиын болғанымен, мұндай мәселе көтерілген жоқ. Тағы бір мәселе қазір көп егін жауын-шашынның болмауынан әрі қатты ыстықтың салдарынан күйіп кетті. Бұл

## ҚҰМ ҚҰРСАУЫНДАҒЫ АУЫЛДАР



**Атырау облысындағы ондаған ауылға құм басу қаупі төніп тұр. Басты себеп — теңіздің тартылуы мен құрғақшылық. Соның салдарынан, толассыз көшкен қызыл құм ауыл ішіндегі үйлерді басып қалуы мүмкін.**

Қазір Атырау облысындағы Исатай ауылы құмның құрсауында қалды. Ауыл тұрғыны Фаруза Сұлтаналиева үреймен өмір сүріп жатқандарын айтады.

«Құмның толассыз басуы ауыл ішіндегі қозғалысты қиындатып жіберді. Кез келген уақытта құм үйімізді басып қала ма деп қорқамыз. Толассыз көшкен құмға аңызак жел қосылғанда, қайда кетерімізді білмейміз. Терезелерді ашып, желдету арман болып қалды», — дейді ауыл тұрғыны.

Исатай ауылының әкімі Аслан Ғұбаштан білгеніміздей, қазір ауылда жағдай қауіпті. Құм тоқтату мақсатында сексеуіл егу жұмыстары қолға алынғанымен, мердігер компания бұл шаруаны аяқсыз қалдырған.

«Быттыр құм тоқтату жұмыстарына 115 млн теңге бөлінді. 27 мың түп сексеуіл егілді. Бірақ мердігер компания жұмысты салғырт ұйымдастырғандықтан, нәтиже болмады. Бүгінде ауылдың ішіндегі қызыл құмды далалық жерге арнайы көліктермен шығару жұмыстарын ұйымдастырып отырмыз. Бірақ дамылсыз көшіп жатқан құм бой бермей тұр», — дейді Исатай ауылының әкімі Аслан Ғұбаш.

Құм басу қаупі төніп тұрған ауылдардың қатарында Зинеден, Сағыз, Қарабау, Нарын, Қарақөл, Жасқайрат елді мекендері бар.

Атырау облыстық Табиғи ресурстар және табиғат пайдалануды реттеу басқармасы басшысының орынбасары Нұргүл Калиеваның айтуынша, соңғы 10 жылда облыста құм көшкіні белең алып бара жатыр.

«Сексеуіл егу жұмыстары тапсырылған «Қайсар» ЖШС кепіл хат беріп, алдын алу бағытындағы жұмыстарды аяқтауға уәде етті. Жұмыстар нәтижелі атқарылмаған жағдайда сотқа жүгінеміз. Ал егер Исатайда қолға алынған жұмыс жемісін берсе, шағылға көмілген елді мекендердің іргесіне сексеуіл егу жалғасатын болады», — деді Нұргүл Калиева.

Жалпы, құм көшкіні бүгін ғана пайда болған проблема емес. Осы ретте біз ауыл шаруашылығы ғылымдарының докторы, профессор Бактыбек Таубаевтан мәселеге байланысты пікірін сұрап көрдік.

«Құм көшкінін тоқтатудың екі амалы бар. Біріншісі — ауылды біртіндеп қолайлы аймаққа көшіру. Екіншісі — жауапкершілікті қолға алып, нақты шаралар қабылдау. Бұл екі жолдың екеуі де орасан қаржыны қажет етеді. Бірақ ауылдарды бәрібір құм көшкінінен құтқару керек», — дейді профессор.

Ғалымның пікірінше, сексеуіл егумен бірге, ауылдардың маңын жасыл оазиске айналдыру да маңызды.

«Құм басу проблемасы осыдан біраз жыл бұрын Маңғыстау облысында болды. Маңғыстаулықтар Алматыдағы География институты ғалымдарымен бірлесіп, үлкен жұмыс атқарды. 2007 жылы Маңғыстау облысындағы Сенек ауылының маңында шамамен 400 гектардай тоғай пайда болып, құмның жылжуы тоқтатылды. Осылайша, Маңғыстаудың шөл даласында тұңғыш рет бір ауылдың маңы жасыл алқапқа айналды», — дейді ауыл шаруашылығы ғылымдарының докторы, профессор Б.Таубаев.

Иә, қазір Атырау облысында ауылдардағы құм көшкінін тоқтату үшін сексеуіл егу, ағаштардан қорған тұрғызу бағытында жұмыстар атқарылып жатыр. Бірақ әңгіме жұмыстарды үйлестіруі тиіс мердігер мекеменің істі салғырт ұйымдастыруында болып отыр. Сексеуіл егу басқа да, оны күту — басқа жұмыс.

«Мәселен, мердігер мекеме былтыр ауылға сексеуіл егіп кетті. Бірақ ол суарылмады. Суаруға өзіміз араласайық десек, ауылда техника жоқ. Ал мердігер мекеме жауапкершілік алғаннан кейін, ағашты егумен шектелмей, оны суарып, әрі қарай өсуіне де жауапты болуы керек», — дейді Зинеден ауылының әкімі Ерлан Ескендірұлы.

Қалай десек те, құм көшкінін тоқтатуға қалың өскен ағаш көмектесе алады. Мердігер мекеме ағашты еккен күннің өзінде, әрі қарай оған күтім тұрақты көрсетілуі керек. Осы ретте шалғай ауылдарды қажетті техникамен қамтамасыз ету мәселесі де назардан тыс қалмаса дейміз.

Баян ЖАНҰЗАҚОВА



Абзал АЛПЫСБАЙҰЛЫ,  
Ақмола облысы

**Қарағанды облысының Қарқаралы ауданындағы Томар ауылында жер дауы туындады. Мәселе шаруа қожалықтарының қуаңшылыққа байланысты егін екпей қалуынан болып тұр. Ал сол жерді емген диқандар «айыппұл төлейсіз» деген шенділердің сөзіне наразы. Томар ауылдық округіне қарасты «Томар» ауыл шаруашылығы өндірісі кооперативі және «Бахтияр» шаруа қожалығы басшылары ақиқатты іздеуде.**

# ШЫҒЫНҒА БАТҚАН ШАРУА

## АЙЫППҰЛ

*арқаласмақ*

лық бақылау жасалып, жерлерін игеру бойынша осы жылдың 1 қарашасына дейін нұсқаулар берілген.

«Осы мерзімге дейін игермеген жағдайда бұл шаруашылықтарға қатысты тексеру шаралары тағайындалып, заңнамаға сәйкес тиісті шаралар қабылданатын болады», — деген екен ауданның жер қатынастары, сәулет және қала құрылысы бөлімі.

Осыған байланысты Томар ауылдық округіне қарасты «Томар» ауыл шаруашылығы өндірісі кооперативінде барлығы 47 202,082 гектар жері бар, оның ішінде жайылымы — 39 735,482 гектар, егістігі — 885 гектар, «Бахтияр» шаруа барлығы 2 255,1979 гектар жері бар, оның ішінде жайылымы — 1 908,1 979 гектар, егістігі — 341 гектар.


Осы аталған «Томар» АӨК және «Бахтияр» ШК жалға алған егістік жерлерін кейінгі 5 жылда игермей отыр. Сол себепті оларға қатысты заңнамаға сәйкес мемлекеттік бақылау шаралары жүргізілген.

Дау осы жерден туындайды. Томар ауылының тұрғындары «Томар» ауыл шаруашылығы өндірісі кооперативі басшысы Капан Мұқтаров пен Нұрлан Максуре жерді мемлекет алғанымен, әлі күнге дейін игерілмегенін, сонымен қатар жерлері қуаңшылықтың зардабын шегіп жатқанын айтты.

— Құрғақшылық кесірінен жерімізге егін сала алмай отырғанымызға төрт-бес жыл болды. Капан ағамыздың жасы 85-те. «Томар» кооперативін басқарып отыр. Егістік жер — менде 341 гектар, Капан ағамыздың шаруашылығында — 800 гектар, — дейді «Бахтияр» шаруа қожалығының құрылтайшысы Нұрлан Орынғазыұлы.

Капан ақсақал Томар ауылын 40 жыл басқарған. Банкрот болып тұрған «Прогресс» миллионер совхоздардың қатарына қосқан. Еңбегі еленіп, «Құрмет белгісі» ордені, басқа да орден-медаль иегері атанған.

— Бұрын жақсы өнім алушы едік. Егін салдық, мемлекетке өткізіп тұрдық. Соның арқасында шаруашылыққа керекті техника алып, паркті жаңарттық. Құрылыс та салынды. Мұның бәрі астықтың арқасы еді. Міне, соңғы жылдары құрғақшылық салдарынан қиыншылыққа ұрындық, — деп мұның шақты.



“

*Төрт-бес жылдағы қуаңшылық шаруаларды әбігерге салуда. Егін салсақ күйіп кетеді. Пайдасынан зияны көп болып тұр. Соның кесірінен «егістік жерді игермедіңдер» деп 20 еселенген айыппұл салып жатыр.*

Нұрлан Максуренің айтуынша, қазір егін түгілі шөп шабындығы да баса ауыртар мәселеге айналған.

— Шыны керек, мал бағу, асырау да проблемаға айналды. Төрт-бес жылдағы қуаңшылық шаруаларды әбігерге салуда. Егін салсақ күйіп кетеді. Пайдасынан зияны көп болып тұр. Соның кесірінен

«егістік жерді игермедіңдер» деп 20 еселенген айыппұл салып жатыр. Мәселенің түп төркініне бажайлап қарап жатқан ешкім жоқ. Бармаған тау, баспаған жеріміз қалмады. Әкімдікке, прокуратураға, Салық комитетіне бардық, басқа да мемлекеттік органдардың есігін тосдырық. Негізгі айтарымыз, «Қарқаралыдан 145

шакырым жердегі Томар елді мекеніндегі егістікті жайылым ретінде қалдырыңыздар» деп өтініш едік. Алайда заң тармағында жазылғандай, «егістік жерлер мемлекеттік» деген желеумен жауапқа тартылып отырмыз, — дейді Нұрлан Максуре.

Бірнеше жыл жауын жаумай, жер қуарып, өнім шықпай, шығынға батқан шаруа айыппұл арқалағанына наразы.

— Егер біз сол жерден пайда көретін болсақ, айырыламыз ба? Жок. 3-4 жыл егін егіп, банкротқа ұшырағаннан кейін доғардық. Қазір егістік емес, малға шабатын шөп — проблема. Енді келіп, қуаңшылық қысқан кезде «сен егін екпедің» деп айыппұл салғанына түсінбей отырмыз. Менің өз басым 145 мың теңге, Капан ақсақалдың қожалығына 1 миллионнан астам айып салынған. Үкіметтің егістік жерді қалағаны дұрыс. Бірақ әр аймақтың жағдайына қарау керек емес пе?! Кейде Қарқаралының орталығына жауған жаңбыр Томарға жоламайды. Томардың

жері басқа аудандардағыдай құнарлы емес. Соны түсінуіміз керек емес пе?! — дейді «Бахтияр» шаруа қожалығының құрылтайшысы.

Шаруаның жанайқайын түсінуге болады. Тың жер деп «тырнағын» басқан кенес дәуіріндегі егістікке айналған жерлердің біразы бүгінде құнарсыз. Бір ғана Қарағанды облысының Нұра, Осакаровка аудандарында жерге таяқ тыға салса, тал болып шықса, Қарқаралы мен Ақтоғай аудандарының жері шынымен де егістікке келмейді. Шырылдап жүрген шаруаның айтары да осы.

Бір қызғын, ауылдағы шаруа айыппұл салынатыны туралы ескерту келгенде ғана дәл осындай заң барын білген. Шалғайдағы ауыл тұрғындарына интернет те толық жетпеген. Бұл енді басқа әңгіме...

Қарағанды облысы

# БАСПАНА БАС АУРУҒА АЙНАЛДЫ



**Атырау қаласына қарасты Талғайраң ауылында осыдан екі жыл бұрын пайдалануға берілуі тиіс көпқабатты үйлер әлі күнге дейін қаңырап тұр. Оған себеп — инфрақұрылымның жоғы. Қоғам белсенділері тіпті салынған үйлердің сапасы сын көтермейтінін айтуда. Мердігер компания өне-міне деп түлікбулаңға салып жүргенде Атырау қаласының өзінде 29 мың тұрғын көрінгеннің пәтерін жалдап, үй кезегін күтіп жүр.**

Көпшіліктің ашуын туғызған жағдайға Парламент Мәжілісінің депутаты, «AMANAT» партиясы фракциясының мүшесі Әділ Жұбанов та араласып, мәселеге алаңдап отыр.

Депутат соңғы жылдары облыста тұрғын үй кезегінің баяу жылжуы және

кезектегілер үшін әлеуметтік тұрғын үй құрылыстарының тоқтап қалуы тұрғындардың наразылығын тудырып отырғанын айтты.

«Қазір Талғайраң елді мекенінде құрылысы 2019 жылы аяқталған 24 тұрғын үй қантарылып тұр. Ол жерде 1 080 от-

басы орналасуы керек еді. Бірақ инженерлік-коммуникациялар толықтай жүргізілмеуі себепті 2021 жылы қолданысқа берілуі тиіс үйлер әлі күнге дейін бос тұр», — дейді Мәжіліс депутаты Әділ Жұбанов.

Депутат бұл жағдаймен әу бастан етене таныс болып шықты.

«2018 жылы Атырау облыстық мәслихат депутаты болған уақытымда Талғайраңда көпқабатты тұрғын үйлер салуға қарсы екенімді, қажетті коммуникация тартылмаған аумаққа жаңа шағынаудан, әлеуметтік нысандар салу-

ға болмайтынын айтып, мәслихат сессияларында қарсы шығып, бірнеше мәрте хат та жолдаған болатынмын. Нәтижесі өздеріңіз көріп отырғандай. Құрылыс жұмыстары жылдар бойы жалғасып, қазіргі жергілікті атқарушы орган қызметінің тиімділігіне тікелей әсер етіп отыр. Бюджет тапшылығы болған өткен жылдарда миллиардтаған қаржы осы шағынауданға коммуникация тартуға жұмсалып, күні бүгінге дейін аяқталмай келеді. Ен сорақысы, тұрғын үйге кезекте тұрған адамдар баспаналы болуды жылдар бойы күтуде», — дейді Мәжіліс депутаты Әділ Жұбанов.

Атырау қалалық әкімдігі бұл жағдайдан хабарлар. Шенділер инженерлік коммуникация толық тартылып біткеннен кейін «музейге» айналған үйлердің жыл аяғына дейін пайдалануға берілетінін айтты. Қазір бұл мақсатқа бюджеттен 3,1 млрд теңге бөлініп отыр.

«Атырау қаласының құрылыс бөлімі» мемлекеттік мекемесінің өкілі Нұрболат Бөлековтің айтуынша, бүгінде Атырау қаласына қарасты Талғайраң елді мекеніндегі, Спутник кентінде магистралды, инженерлік-коммуникациялық инфрақұрылым құрылысы жүріп жатыр.

«Бұдан басқа, Талғайраң елді мекеніндегі 24 бес қабатты үйде ішкі өрлеу жұмыстары жүргізілуде», — делі Нұрболат Бөлеков.

Атырау облысының әкімі Серік Шәпкеновтің айтуынша, қазір Атырау қаласында 52 тұрғын үй салынууда. Быыл 10 тұрғын үй пайдалануға беріледі. Келесі жылы 32 тұрғын үй тапсырылады. Оның 24-і кезекте тұрғандарға беріледі. Бұдан басқа, өңірде халықты тұрғын үймен қамтамасыз етуге бағытталған «Атырау жастары», «Бақытты отбасы — Атырау» бағдарламалары іске асырылуда. Десе де, үй кезегінде тұрған 29 мың адамның сұранысын қанағаттандыруға бұл құрылыстар жеткіліксіз болып тұр.

Тұрғын үй кезегінде тұрғандардан бөлек «мұнайлы астанада» әлі күнге дейін апатты үйлер проблемасы өткір тұр. Қазір облыста тозығы жеткен 112 көп-пәтерлі апатты үй есепте тұр. Оның 82-сі — Атырау қаласында. Қалғандары — аудандарда.

Бұдан бөлек, құрылысы басталмай жатып тоқтап тұрған үйлер проблемасы атыраулықтарға жақсы таныс. Мәселен, Атырауда жүздеген үлескерден ақша жинап алып, үш жылдан бері құрылысы тоқтап тұрған бірнеше үй бар.

«Атамекен Тұрғын Үй», Baisanat Residence және Saraişuq Invest Group кооперативтерінің үстінен қазір қылмыстық іс қозғалып жатыр. Жакында ғана «нарықтағы бағадан айтарлықтай арзан үй салып береміз» деген жарнамамен 271 адамның ақшасын жинап алған «Ақмаржан» және «Жібек жолы» тұрғын үй-құрылыс кооперативінің құрылтайшылары сотталды.

«Егер қарапайым азаматтарға арналған әлеуметтік тұрғын үйлер көптеп салынса, мүмкін алаяқ кооперативтерге алданушылар болмас па еді?! Мен Saraişuq Invest Group кооперативіне 6 миллион теңге ақшамды берген адаммын. Анам екеуіміз бір бөлмелі ескі баракта тұрамыз. Әкемнен қалған ескі үй андамныңда көшіп, пәтер жалдаудан пана болып тұр. Бірақ уақыт бір орында тұрмайды ғой. Әлеуметтік үйлер көбірек салынса, арзандау үйді ипотекаға оңай рәсімдеп алар едік. Енді, міне үй де, ақша да жоқ. Тесік табақпен қалып отырмыз», — дейді баспаналы болудан әбден күдерін үзген Атырау қаласының тұрғыны Альберт Аманжолов.

Ал жылдар бойы тұрғын үй кезегінде тұрып, жана баспана кілтің сарыла күтіп жүргендердің жыры — өз алдына бөлек тақырып. Шынайы картина сол, бүгінде Атырауда 29 мың «квартирант» тұрғын үй кезегінде тұр.

Баян ЖАНУЗАҚОВА





